

Na osnovu člana 10. i 27. Statuta Notarske komore Republike Srpske i Odluke Skupštine Notarske komore Republike Srpske broj 52/10 od 26.01.2010. godine, te člana 9 stav 1 tačka 14 te člana 52 Statuta Notarske komore Federacije Bosne i Hercegovine i Odluke Skupštine Notarske komore Federacije Bosne i Hercegovine br. 36-1/10 od 18.01.2010. godine, a u skladu s članom 3. stav 2. Statuta Međunarodne unije notara ugovorne strane:

1. NOTARSKA KOMORA REPUBLIKE SRPSKE, Banjaluka koju zastupa predsjednik Marinko Plavšić, i
2. NOTARSKA KOMORA FEDERACIJE BOSNE I HERCEGOVINE, Sarajevo, koju zastupa predsjednik Sefedin Suljević,

dana 27.01.2010. godine u Zenici zaključuju

**UGOVOR O PREDSTAVLJANJU I ZASTUPANJU U MEĐUNARODNOJ UNIJI NOTARA – UINL
ENTITETSKIH NOTARSKIH KOMORA BOSNE I HERCEGOVINE – NOTARSKE KOMORE REPUBLIKE
SRPSKE I NOTARSKE KOMORE FEDERACIJE BOSNE I HERCEGOVINE**

Član 1.

Ovim ugovorom Notarska komora Republike Srpske i Notarska komora Federacije Bosne i Hercegovine (u daljem tekstu: ugovorne strane - Komore) uređuju pitanje predstavljanja i zastupanja Komora u Međunarodnoj uniji notara (u daljem tekstu: UINL).

Član 2.

Za predstavljanje i zastupanje entitetskih notarskih komora Bosne i Hercegovine – Notarske komore Republike Srpske i Notarske komore Federacije Bosne i Hercegovine u UINL obrazuje se Komisija pod nazivom: **Komisija entitetskih Notarskih komora Bosne i Hercegovine - Notarske komore Republike Srpske i Notarske komore Federacije Bosne i Hercegovine**, odnosno **Komisija entitetskih komora Bosne i Hercegovine – Notarske komore Federacije Bosne i Hercegovine i Notarske komore Republike Srpske** (u daljnjem tekstu Komisija).

Oba naziva su u ravnopravnoj upotrebi.

Komisija nema status pravnog lica.

Sjedište Komisije je u sjedištu Komore iz koje dolazi Predsjednik Komisije.

Član 3.

Svaka Komora imenuje po dva člana Komisije, a to su po funkciji: predsjednici Komora i predsjednici Upravnih odbora Komora.

Član 4.

Komisija ima Predsjednika i zamjenika a to su po funkciji predsjednici Notarskih komora.

Mandat članovima Komisije traje onoliko dugo koliko im traje mandat funkcije u Komori iz koje su imenovani.

Obavljanje funkcije Predsjednika Komisije i njegovog zamjenika se vrši pravilnim naizmjeničnim rasporedom na način da se u svakom narednom mandatu Predsjednik Komisije i njegov zamjenik bira iz druge Komore u odnosu na Komoru iz koje su imenovani u proteklom mandatu.

Raspored obavljanja funkcije predsjednika Komisije će se odrediti odlukom Komisije.

Član 5.

Komisija sve odluke donosi konsenzusom, a u slučaju da se ne postigne konsenzus, svaka ugovorna strana može po prethodno pribavljenom mišljenju svoje Skupštine odlučiti o daljnjoj sudbini ovog ugovora.

Član 6.

Predsjednik Komisije u UINL istupa prema odlukama, zaključcima, stavovima i preporukama Komisije, koju je dužan blagovremeno upoznati o svim aktivnostima.

Predsjednik Komisije ravnomjerno predstavlja Komore u UINL, bez obzira iz koje Komore dolazi, i obavezno u svim istupanjima i komunikaciji s UINL i javnošću navodi da je Predsjednik Komisije za predstavljanje entitetskih Notarskih komora BiH.

Za slučaj da Predsjednik Komisije postupa na suprotan način Komore su saglasne da se taj Predsjednik Komisije odmah opozove, a ako nema konsenzusa i o tom pitanju, svaka ugovorna strana ima pravo na primjenu prethodnog člana ovog ugovora.

Član 7.

Komisija imenuje u skladu s odlukama nadležnog organa svake ugovorne strane iz redova notara predstavnike u organe UINL-a, i njihove zamjenike vodeći računa o ravnomjernoj zastupljenosti obje Komore.

Predstavnicima u UINL obavezno o svom radu poslije svake aktivnosti u UINL podnose izvještaj Komisiji i Upravnim odborima ugovornih strana, a Komisija najmanje jednom godišnje podnosi izvještaj Komorama.

Član 8.

Komora iz koje dolazi Predsjednik Komisije obezbjeđuje uslove za rad i snosi sve troškove Komisije (osim naknada članovima Komisije).

Komora iz koje dolazi zamjenik Predsjednika Komisije i članovi organa UINL snosi njihove troškove. Izuzetno Upravni odbori Komora mogu i drugačije odlučiti.

Član 9.

Obaveze svake ugovorne strane za članstvo u UINL Komore snose srazmjerno broju svojih članova.

Član 10.

Ovaj ugovor stupa na snagu danom potpisivanja, a sačinjen je u devet istovjetnih primjeraka od čega svaka ugovorna strana dobija po četiri primjerka a jedan primjerak je sačinjen za UINL.

za Notarsku komoru RS

Marinko Plavšić, predsjednik

Broj: 53/10

za Notarsku komoru F BiH

Sefedin Suljević, predsjednik

Broj: 82-2/2010